



t Schoap en n droad

*Wel in t Aamsven goad oet de oogn kik,
zöt lign de boerderi-jn n Haazn, de Weps en t Spik,
en an de Bek-kaamp en ne Moat
twee nöaste noabers: t Schoap en n Droad.*

*Van disse twee wo'k verteln now,
wat doar gebuurd is, joa, en how.
t Was nich alleen doar, da's wa wis,
in aandre heuk gung t ok wal ees mis.*

*Twee van n zöldn leaftied, ie könt t wa roadn,
zag ie mangs achter n viemhoop stoan.
Lestns kwamn ze nog tehoop oet de schop:
t heui zat eer nog boavn op 'n kop.*

*t Schoap har n Jenske, t gung oawer hoowe hekn,
t keerlke kon ja alns maakn en brekn.
Bie n Droad: n Marietje, leavndig en fris van kluur,
t har alns met, ok mooi hoalt vuur de boavnduur.*

*Noa ne tied kwam Droads-moor op verzieet
bie t Schoap, mer har nich heel völ tied,
want eer wicht was kraank, naa wit en t har gen zin,
t spreenk oet n noad, t kan gen rökske hoast meer in....*

*Schoaps-moor zeg: oons Jenske is ok nich best;
zit vaak stil in 't heukske, en wat har e lest?
k Zag m duur t glas hen komn oet de schop
en greep zich gedurig noar n kop.
Droads-moor zeg: morn wi'k met Marietje noar n dokter hen.
Ze gungn dan al heel vroom oet t ven.*

*Bie t oonderzoek heurn ze n dokter zegn:
Vrouw Droad, ie komt nog wier an n kreentnweg.
t Wich is nich kraank, t hef genne kwoal,
en t is in de weald ok nich t eerste moal:
kiek doe temet mer ees in de kast,
want t linngood koomp die vlot van pas.*

*Ze stoomn noar hoes hen met ne bes,
noar de buurvrouw, t ni-js was ja nog vers,
want Schoaps-moor mos ze t eerste zegn
wat n dokter har zeg van n kreentnweg!*

*Ik weet now ok wat oons wichke schot
en wat wie beidn heel binnkort wordt!
En oew Jenske, a'k dat now zoo heur,
koomp wa wier terug van zien kopgezeur.*

*Buurvrouw, ik zal t die zegn, doe mos t wetn:
dien schoap hef bie oons oonder n droad hen vretn.*